



INTRODUCZIUN

DA SORA MARIA VINCENZ

En quei capetel metta Jesus danovamein avon egl a ses giuvnals, tgei che suandar el vul dir. Las expressiuns en quei text irriteschan nus oz, tonpli fetg che nus enconuschein in auter Jesus – in Jesus amitg dils carstgauns, dils paupers e malsauns, plein carezia per tuts, in che vul la pasch. Ed ussa quels plaid. Quels anflein nus ozildi plitost tier ils terrorists ed ideologists, ils quals vulan sfurzar si lur ideas ad auters. – Pertgei plaida Jesus aschia?

El Veder Testament vegn il maletg dil fiug duvraus pil giuvenessendi. Jesus drova quei maletg pigl «avegnir dil reginavel da Diu». Igl ei il temps dalla dertgira, dalla purificaziun, dalla decisiun. Plinavon fa Jesus danovamein attents nus, nua che sia via meina el: «el pitir e murir!» Igl ei in sfundrar, sco in bastiment che va sutsura. Detg cun auters plaid: «Jeu stoi ir tras quella stgira experientscha. Jeu sesanflet en ina profunda tensiun, avon che jeu sai sortir sco victur!» – La crusch stat adina avon el. Cun siu vegnir ei era discordia nunevitabla! Puspei detg cun auters plais: La decisiun per Jesus sa metter carstgauns, amitgs ... in encunter l'auter.

EVANGELI

Lc 12,49–53

⁴⁹Jeu sun vegnius per purtar fiug sin tiara, e con bugen vess jeu ch'el fuss gia envidaus! ⁵⁰Jeu stoi retscheiver in batten, e tgei anguscha che jeu hai tochen ch'igl ei cumplenu!

⁵¹Carteis vus che jeu seigi vegnius per purtar la pasch sin tiara? Na, jeu ditgel a vus: Plitost la discordia.

⁵²Da cheu naven vegn ei ad esser aschia: Sche tschun ein en ina casa, vivan els en discordia, treis encunter dus e dus encunter treis; ⁵³il bab encunter il feagl ed il feagl encunter il bab, la mumma encunter la feglia e la feglia encunter la mumma, la sira encunter la brit e la brit encunter la sira.